

四庫全書

史部

欽定四庫全書

十六國春秋卷八十一

後涼錄一

呂光

呂光字世明略陽氏人也父婆樓佐命苻堅官至太尉  
光以石氏建武四年生於枋頭夜有神光舉家異之故  
遂以光為名年十歲與諸兄弟遊戲邑里好為戰陣之  
法羣童咸推為主割土處中部分詳平羣童歎服不好

讀書惟樂鷹馬及長連結賢豪好施待士身長八尺四

寸目重瞳子左肘生肉印性沈重質略

一作朴

寬大有度

量喜怒不形于色時人莫之識唯王猛布衣時見而異之曰此非凡人也言之於苻堅舉賢良除美陽令夷夏愛服鄰境肅清遷鷹揚將軍從征張平戰於銅壁刺平養子蚝中之自是威名大著苻雙反于秦州堅將楊成世為雙將苟興所敗光與王鑒討之鑒欲速戰光曰興初破成世奸氣漸長宜持重以俟其敝興乘勝輕來糧

竭必退退而擊之可以破也二旬而興退諸將不知所  
為光曰揆其奸計必攻榆眉若得榆眉據城斷路資儲  
復贍非國之利也宜速進師若興攻城尤須赴救若其  
奔也彼糧既盡可以滅之鑒從之果敗興軍從王猛平  
慕容暉封都亭侯苻重鎮洛陽表光為長史及重謀反  
堅聞之曰長史呂光忠孝方正必不與之同謀馳使命  
光收重檻車送之尋入為太子右率甚見親重蜀人李  
焉一作鳥聚衆二萬攻逼益州以光為破虜將軍率兵討

滅之遷步兵校尉苻洛反光又擊平之拜驍騎將軍秦  
建元十九年春正月堅既尅平山東士馬強盛遂有圖西域  
之志乃以光為使持節都督西域征討諸軍事率將軍姜

飛彭晃杜進康盛

一作隆

等總步兵七萬鐵騎五千討西

域以隴西董方馮翊郭抱武威賈虔弘農楊穎為四府  
將佐堅太子宏執光手曰君器相非凡必有大福宜深  
保重行至高昌聞堅寇晉光欲更須後命部將杜進曰  
節下受任金方赴機宜速有何不了而更留乎冬十二

月光進及流沙三百餘里無水將士失色光曰吾聞李  
廣利精誠玄感飛泉湧出吾等豈獨無感致乎皇天必  
將有濟諸君不足憂也俄而大雨平地水深三尺進兵  
焉者其王泥流率其傍國請降惟龜茲王帛純帛一作白拒  
命不降光軍其城南五里為一營深溝高壘廣設疑兵  
以木為人被之以甲羅列壘上將為持久之計帛純驅  
徙城外人入於城中附庸侯王各嬰城自守至是光左  
肘肉印隱起成字文曰巨霸營外夜有一黑物大如斷

堤動搖有頭角目光若電及明而雲霧四塞遂不復見  
旦視其處南北五里東西二十餘步鱗甲隱於地所昭  
然猶在光笑曰黑龍也俄而雲起西北暴風滅其迹杜  
進言於光曰龍者神獸人君利見之象易曰見龍在田  
德施普也斯誠明將軍道合靈和德符幽顯所致願將  
軍勉之以成大慶光有喜色遂進軍攻龜茲城其夜夢  
金象飛越城外光曰此謂佛神去之胡必亡矣攻城益  
急帛純乃傾國財寶重賂于獐胡以求救獐胡王遣其

弟唃廝囉侯將虜率騎二十餘萬并引溫宿尉須等諸國王及諸胡内外合七十餘萬人來救胡便弓馬善矛稍鎧如連鑠射不可入又以革索為繡策馬擲人多有中者衆甚憚之諸將咸欲每營結陳案兵拒之光曰彼衆我寡營又相遠勢分力散非良策也於是遷營相接按陣為鈎鑠之法精騎為遊軍彌縫其闕戰於城西大敗之斬首萬餘級帛純收其珍寶遁走王侯降者三十餘國光入其城城有三重廣輪與長安城等城中塔廟千

數又以種田畜牧為業男女皆剪髮垂項宮室壯麗煥  
若神居光乃大饗將士賦詩言志命參軍京兆段業著  
龜茲宮賦以記之胡人奢侈厚於養生家有蒲桃酒或  
至千斛經十年不敗士卒淪沒酒藏者相繼又有千斛  
蒲桃士卒取實來離宮別館傍盡種之因得其樂器有  
箜篌琵琶五絃笙笛簫鼗篳毛圓鼓都曇鼓答臘鼓腰  
鼓羯雞婁鼓鐘鼓其等十五種為一部工二十人歌曲  
有善善摩尼解曲婆迦兒舞曲有天殊勒監曲諸國憚

光威名貢款屬路光撫寧西域威恩甚著桀黠胡王昔所未賓者不遠萬里望風歸附上漢所賜節傳光皆表而易之立帛純弟震為龜茲王撫其遺衆建元二十年秋八月光上疏奏捷於堅堅知光平西域以為使持節散騎常侍都督玉門已西諸軍事安西將軍西域校尉進封順鄉侯增邑一千戶道絕不通建元二十一年春正月光既平龜茲以龜茲饒樂遂有留居之志始獲天竺沙門鳩摩羅什先是光軍未至什謂龜茲王曰國運

衰矣當有勅敵目下從東方來宜恭承之勿抗其鋒純  
不從至是果敗光未測什智量見其年少乃以凡人戲  
之強妻以龜茲王女拒而不受光曰道士之操不踰光  
父何所固辭因飲以醇酒同閉密室什既被逼遂虧其  
節或令騎牛及乘惡馬欲使墮落什嘗懷忍辱曾無愠  
色光還中路置軍山下將士已休什曰不可在此必見  
狼狽宜徙軍隴上光不納夜果大雨洪潦暴起水深數  
丈死者數千人遂深異之光欲畱王西國什謂光曰此

凶亡之地不可淹留推運揆數將軍宜速東歸中路自有福地可居光乃大饗文武博議進止衆咸請還光乃從之三月光以駝二萬餘頭致外國珍寶及奇伎異戲殊禽怪獸千有餘品駿馬萬餘匹而還秋九月光自龜茲還至宜禾秦涼州刺史梁熙謀閉境拒之高昌太守楊翰言於熙曰呂光新破西域兵強氣銳其鋒不可當也度其事意必有異圖且今關中擾亂京師存亡未知自河已西迄于流沙地方萬里帶甲十萬鼎峙之勢實

在今日若光出流沙其勢難敵高梧

一作高桐

谷口險阻之

要宜先守之而奪其水彼既窮渴自然投戈如其以遠

不守伊吾之關亦可拒也若度此二阨雖有子房之策

無所施矣地有所必爭真此機也熙不從美水令犍為

楊

一作張

統說熙曰主上傾國南討覆敗而還慕容垂擅

兵河北泓沖寇逼京師丁零雜虜跋扈關洛州郡姦豪

所在風扇王綱弛絕人懷利己今呂光迴師其志難測

將軍何以抗之熙曰誠深憂之未知計之所出統曰光

雄果勇毅智略過人今擁思歸之士乘戰勝之氣其鋒

未易當也

一云今以蕩西域之威擁歸師之銳鋒若猛火之盛於原弗可敵也

將軍世受

殊恩忠誠夙著立勲王室宜在今日行唐公洛上之從  
弟勇冠一時為將軍計者莫若奉為盟主以收攝衆望  
推忠義以總帥羣豪則光雖至不敢有異心也資其精  
銳東兼毛興西連王統楊璧合四州之衆掃凶逆於諸  
夏寧帝室於關中此桓文之舉也熙又弗從乃殺洛於  
西海光聞楊翰之謀懼不敢進杜進諫曰梁熙文雅有

餘機鑒不足終不能納翰之謀也願將軍不足憂之聞其上下未同宜在速進進而不捷請受過言之誅光從之進至高昌楊翰以郡迎降及至玉門梁熙傳檄責光擅命還師遣子鷹揚將軍盾與振威將軍南安姚皓別駕衛翰率衆五萬拒光於酒泉燉煌太守姚靜晉昌太守李純以郡迎降光報檄涼州責熙無赴難之誠數其退歸師之罪遣彭晃杜進姜飛等為前鋒擊盾戰于安彌大敗之盾輕將麾下數百騎逃奔杜進追而擒之於

是西山胡夷皆來款附武威太守彭濟執熙請迎光乃  
殺熙涼州郡縣望風奔降獨建威將軍西郡太守索泮  
奮威將軍酒泉太守宋皓城守不下攻而執之並為光  
所殺光遂入姑臧自領涼州刺史護羌校尉表杜進為  
輔國將軍武威太守封武始侯其餘將佐封拜有差主  
簿尉祐姦佞傾險見棄前朝與彭濟同謀執熙光深見  
寵任乃譖誅姚皓及天水尹景等名士十餘人遠近頗  
以此失望人懷離貳光尋擢祐為寧遠將軍金城太守

祐次允吾襲據外城以叛祐從弟隨據鷓陰起兵應之光遣將軍魏真討隨隨敗奔祐光將姜飛又擊敗祐衆祐奔據興城扇動百姓夷夏多從之飛司馬張象叅軍郭雅謀殺飛應祐發覺逃奔

太安元年春正月初苻堅之敗張天錫南奔其世子大豫為長水校尉略陽王穆所匿堅還長安穆將大豫俱奔河西依禿髮思復鞬思復鞬送之魏安至是魏安人焦松齊肅張濟等起兵數千迎大豫為主攻拔昌松郡

執太守王世強二月光遣輔國將軍杜進擊之進等敗績大豫遂進逼姑臧求決勝負王穆諫曰呂光糧豐城固甲兵精銳逼之非利不如席卷嶺西厲兵積粟然後東向而爭不及暮年光可平也大豫不從乃自號撫軍將軍涼州牧改元鳳凰以王穆為長史傳檄郡縣使穆求救於隴西諸郡建康太守李暕祁連都尉嚴純及閭襲等起兵應之有衆三萬保據楊塢夏四月大豫自揚塢進屯姑臧城西王穆率衆三萬及秃髮思復鞬子奚

于

一作

等陣於城南光出擊大破之斬奚于等二萬餘

級光謂諸將曰大豫若用王穆之言恐未可平也諸將  
皆曰大豫豈不及此耶皇天欲贊成明公八百之業故  
令大豫迷於良算耳光大悅賞賜金帛有差是時堅子  
丕以光為車騎大將軍涼州牧領護西羌大都督酒泉  
公使者沒於後秦不能達秋九月光始聞苻堅為姚萇  
所害奮袂哀號三軍縞素大臨於城南傳檄諸州期孟  
冬大舉偽謚堅曰文昭皇帝長吏百石以上服斬纁三

月庶人哭泣三日冬十月光大赦境內建元太安十一月羣僚勸進光曰長蛇未殄方掃除國難不宜進位元台張大豫自西郡入臨洮驅略百姓五千餘家保據俱城光將彭晃徐靈攻破之大豫奔廣武穆奔建康廣武人執大豫送之斬於姑臧市十二月光自稱使持節侍中中外大都督隴右河西諸軍事大將軍領護匈奴中郎將涼州牧酒泉公

太安二年春正月姑臧大風折木從申至辰遣中郎房晷

至晉昌祀風穴羅什謂光曰不祥之風當有奸叛然不  
勞自定也秋八月甘露降於逍遙園白鷺翔于酒泉衆  
鷺成列而從之時王穆襲據酒泉自稱大將軍涼州牧  
光以郭騰讖言改昌松郡為東張掖郡冬十二月涼州  
大饑穀價踴貴斗米直錢五百文人相食死者大半光  
西平太守康寧自稱匈奴王殺河湟太守強禧阻兵以  
叛光屢遣兵討之不剋別將徐靈與張掖太守彭晃謀  
叛光遣將討靈靈奔於晃晃東結康寧西通王穆光欲

自擊晃諸將皆曰今康寧在南阻兵伺隙若大駕西行寧必乘虛出於嶺左晃穆未平康寧復至進退狼狽勢必大危光曰事勢寔如卿言然我今不往是坐待其來也晃穆共相唇齒寧又同惡相濟若三寇連兵東西交至則城外皆非吾有大事去矣今晃叛逆始爾寧穆與之情契未密及其倉卒取之為易且隆替命也卿勿復言乃自率步騎三萬倍道兼行既至攻之二旬晃將寇顓斬關納光遂拔其城誅彭晃初王穆之起兵也遣使

招燉煌處士郭瑀瑀歎曰臨河救溺不卜命之短長脈  
病三年不豫絕其殮饋魯連在趙義不結舌況人將左  
袵吾安忍不救之乃與同郡索燾起兵五千運粟三萬  
石以餉穆穆以瑀為太府左長史軍師將軍燾為燉煌太  
守瑀雖居元佐而口詠黃老冀功成世定追伯成之蹤  
既而穆惑於讒間忌燾威名率衆伐燾瑀諫曰昔漢定  
天下然後誅功臣今事業未建而誅之立見麋鹿遊于  
此庭矣穆不從瑀出城大哭舉手謝城曰吾不復見汝

矣還而引被覆面不與人言不食七日輿疾而歸旦夕  
祈死夜夢乘青龍上天至屋而止寤而歎曰龍飛在天  
今止於屋屋之為字尸下至也龍飛屋上尸至吾其死  
也古之君子不卒內寢沉吾正士乎遂還酒泉南山赤  
崖閣飲氣而卒光聞穆之伐故謂諸將曰二虜相攻此  
成擒也將攻之諸將咸以為不可光曰取亂侮亡武之  
善經不可以憚累征之勞而失永逸之機也遂率步騎  
二萬攻酒泉克之進次涼興穆引師東還路中衆散穆

單騎奔驛馬驛馬令郭文斬首送之龜茲國使至獻寶  
貨奇珍汗血馬光臨正殿設會文武博戲

太安三年春正月光信讒言殺武威太守杜進他日與  
羣僚讌酒酣語及政事時刑法峻重叅軍京兆段業進  
曰嚴刑重憲非明王之義也光曰商鞅之法至峻而兼  
諸侯吳起之術無親而楚以霸何也業曰起喪其身鞅  
亡其家皆殘酷之致也明公受天眷命方開建大業景  
行堯舜猶懼不濟奈何欲以商申之末法臨道義之神

州豈此州士女所望於明公哉光改容謝之於是下令  
責躬乃崇寬簡之政是年燉煌太守宋歆送同心梨陳  
平仲涼州記作陳沖得玉璽獻之博三寸長四寸直看無文字  
向日視之字在腹中有三十四字言光當王又白雀巢  
於陽川令蓋敏屋光下令諸臣為之賦時獻詩及賦者  
凡百餘人

麟嘉元年春正月張掖金澤縣有麟見百獸皆從光以  
為已瑞於是羣僚奉表請崇進名號遂以晉孝武太元

十四年二月僭即三河王位於南郊置百官自丞郎已下猶攝州縣事大赦境內改元麟嘉光妻石氏子紹弟德世自仇池來至姑臧光迎於城東大饗羣臣立石氏為王妃子紹為世子譙羣臣於內苑新堂遣市璽玉於于闐冬十月遣弟左將軍他子武賁中郎將纂討北虜匹勤於三巖山大破之是年造刀一口銘其背曰麟嘉長三尺六寸

麟嘉二年秋九月太廟新成追尊高祖為敬公曾祖為

恭公祖為宣公父為景昭王母為昭烈妃中書侍郎楊  
穎上疏請依三代故事追尊呂望為始祖永為不遷之  
廟光從之是歲焉耆國王龍熙遣子入侍張掖督郵傅  
曜考覈郡縣而丘池令尹興殺之投諸空井曜見夢於  
光曰臣張掖郡小吏案校諸縣而丘池令尹興賊狀狼  
藉懼臣言之殺臣投於南亭空井中臣衣服形狀如是  
光寤而猶見久之乃滅遣使覆之如夢光怒殺興

麟嘉三年春二月著作郎段業以光未能揚清激濁使

賢愚殊貫因療疾于天梯山作表志詩九歎七諷十六篇以諷之光覽之而悅署業為建康太守冬十月金城王乞伏乾歸遣南羌彭奚念入攻白土都尉孫峙退奔興城光遣兵乘虛伐金城乾歸聞之引兵而去光亦引還

麟嘉四年秋八月光遣南中郎將方及弟右將軍寶振威將軍楊範強弩將軍竇苟攻乞伏乾歸於金城方屯河北寶進師濟河為乾歸所敗寶及將士死者萬餘人

光又遣武賁中郎將纂及竇苟率步騎五千南攻彭奚  
念戰于盤夷纂大敗而歸光遂率兵親討復遣纂及揚  
武將軍略陽楊軌建中將軍沮渠羅仇建武將軍梁恭  
軍於左南奚念大懼乃於白土津累石為堤以水自固  
遣精兵一萬拒守河津光遣將軍王寶潛趣上津夜渡  
湟河光濟自石堤攻剋枹罕奚念單騎奔甘松光振旅  
而還

麟嘉五年春正月初光徙西海郡人於諸郡至是諺曰

朔馬心何悲念舊心中勞燕雀何徘徊意欲還故巢頃  
之遂相扇動復徙之於河西樂都秋七月羣議以高昌  
雖在西垂地居形勝外接胡虜易生翻覆宜遣子弟鎮  
之光以子覆為使持節鎮西將軍都督玉門已西諸軍  
西域大都護鎮高昌命大臣子弟隨之

麟嘉六年春正月光遣使拜禿髮烏孤假節冠軍大將  
軍河西鮮卑大都統廣武郡侯夏六月光帥衆十萬伐  
西秦王乞伏乾歸乾歸遣使稱藩以子勃勃為質光引

兵還

勅勅西秦  
錄作勅勅

龍飛元年夏六月五龍見於浩亶羣臣咸賀勸光稱尊  
光於是以晉太元二十一年僭即天王位大赦境內殊  
死已下改元龍飛備置郡司立世子紹為太子封庶長  
子纂為太原公秦州刺史弟延為天水公弘為常山公  
其餘子弟為公侯者十七人署中書令王詳為尚書左  
僕射著作郎段業等五人為尚書又遣使拜禿髮烏孤  
為征南大將軍益州牧左賢王冬十月西秦涼州牧乞

伏軻彈與秦州牧乞伏益州不平彈率衆來奔光下書  
曰乾歸狼子野心前後反覆朕方東清秦趙勒銘會稽  
豈令豎子鴟峙洮南且其兄弟內相離間可乘之機無  
過今也其勅中外戒嚴朕當親討

龍飛二年春正月光大舉攻西秦師次於長最乾歸羣  
下請東奔成紀以避之乾歸曰軍之勝敗在于巧拙不  
在衆寡光兵雖衆而無法其弟延勇而無謀不足憚也  
且其精兵盡在延所延敗光自走矣二月光使太原公

纂率楊軌寶苟等步騎三萬攻金城乾歸率衆二萬來  
救光遣將軍王寶等率騎五千邀之乾歸懼而不進遂  
拔金城執太守衛鞬鞬瞋目謂光曰吾寧守節斷頭誓  
不為降虜也光義而免之光又遣將軍梁恭金石生與  
秦州刺史沒奕干以甲卒萬餘出陽武下峽攻其東天  
水公延以袍罕之衆攻臨洮武始河關皆剋之乾歸因  
大震泣歎曰死中求生正在今日也乃縱反間紿延云  
乾歸衆潰東奔成紀延欲引輕騎追之司馬耿稚諫曰

乾歸雄勇過人權略難測破王廣剋楊定皆羸師以誘之雖蕞爾小國亦不可輕也困獸猶鬪況乾歸安肯望風自潰乎且告者視高而色動必有奸計今宜整步陳而前使步騎相接徐俟後軍畢集然後擊之可一戰滅也延不從進與乾歸相遇戰敗死之耿稚及將軍姜顯收集散卒還屯枹罕光亦引兵還于姑臧夏四月初張掖臨松盧水胡沮渠羅仇匈奴沮渠王之後也世為部帥光以羅仇為尚書從伐西秦及延敗死羅仇弟三河

太守沮渠麴粥謂羅仇曰主上荒耄信讒今軍敗將死  
正其猜忌智勇之時也吾兄弟素為所憚與其經死溝  
瀆孰若勒兵向西平出苕藿奮臂大呼涼州不足定也  
羅仇曰理如汝言但吾家累世忠孝為一方所歸寧人  
負我無我負人也未幾光果殺羅仇及麴粥羅仇弟子  
蒙遜求帥喪還葬鄉里諸部會葬者萬人蒙遜哭謂衆  
曰呂主昏荒無道多殺不辜吾家上世雄視河西今欲  
與諸部雪二父之恥復上世之業何如衆多從之遂殺

光護軍馬邃攻拔臨松郡屯據金山大為百姓之患蒙  
遜從兄男成先為光將守晉昌聞蒙遜起兵逃奔貲虜  
扇動諸夷衆至數千進攻福祿建安將軍寧戎護軍趙  
策擊敗之男成退奔樂涇五月光遣太原公纂率衆二  
萬擊敗蒙遜於忽谷酒泉太守壘澄率將軍趙策趙陵  
步騎萬餘討男成於樂涇戰敗澄策死之男成進攻建  
康遣人說建康太守段業曰呂氏政衰權臣擅命刑罰  
失中人不堪役一州之地叛者連城瓦解之形昭然在

目百姓嗷然無所依附府君奈何以蓋世之才欲立忠於垂亡之國乎男成等既唱大義欲屈府君俯臨鄆州使塗炭之餘獲來蘇之惠何如業不從相持二旬外救不至郡人高逵史惠等言於業曰今孤城獨立臺無救援府君雖心過田單而地非即墨宜思高算轉禍為福業先與光侍中房晷僕射王詳不平懼不自容乃許之自稱大都督龍驤大將軍涼州牧建康公光命太原公纂將兵五萬討業時謂業等烏合纂有威聲勢必克全

光以問羅什什曰觀察此行未見其利既而蒙遜進屯  
臨洮為業聲援戰於合離纂兵大敗秋八月光散騎常  
侍西平郭磨以光年老知其將敗遂與僕射王詳起兵  
作亂詳為內應事發光乃誅詳磨遂據東苑以叛民間  
皆言聖人舉兵事無不成從之者甚眾磨以為代呂者  
王乃推王乞基為主光馳使召纂討磨纂將還諸將勸  
纂曰段業聞師迴必躡軍後若潛師夜還庶無後患也  
纂曰業雖憑城阻眾無雄略之才若夜潛還適足張其

奸志耳乃遣使告業曰郭磨作亂吾今還都卿能決者可早出戰遂棄大軍先將輕騎引還業亦不敢出纂司馬楊統謂其從兄桓曰郭磨明善天文起兵其當有以京城之外非復朝廷之有纂今還都復何所補請除纂勒兵推兄為盟主西襲呂弘據張掖號令諸郡亦千載一時也桓怒曰吾聞臣子之事君親有隕無二吾為呂氏臣安榮其祿危不能救豈可復增其難乎呂氏若亡吾為弘演矣統懼至番禾奔歸于磨磨遣軍邀纂于白

石纂大敗光西安太守石元良率步騎五千赴難與纂  
共擊磨軍破之遂入姑臧涼人張捷宋生等招集戎夏  
三千餘人反於休屠城與磨共以書牋招誘後將軍楊  
軌推為盟主軌性粗直不慮磨之傾危河西太守程肇  
諫曰將軍之與呂王可謂臭味是同今欲釋同心託異  
類背龍頭從蛇尾非將軍之高算也願將軍熟思之軌  
不從乃自稱大將軍涼州牧西平公纂擊磨將王斐于  
城西大破之磨勢漸衰遣使請救于秃髮烏孤九月烏

孤使弟驃騎利鹿孤帥騎五千援磨冬十一月光遺楊  
軌書曰自羌胡不靖郭磨叛逆南藩安否音問兩絕行  
人風傳云卿擁逼百姓為磨唇齒卿雅志忠貞有史魚  
之操鑒察成敗遠侔古人豈宜聽納姦邪以虧大美凌  
霜不彫者松柏也臨難不移者君子也何圖松柏彫於  
微霜而雞鳴已於風雨郭磨巫卜小數時或誤中考之  
大理率多虛謬朕宰化寡方澤不逮遠致世事紛紜百  
城離叛戮力一心同濟巨海者望之於卿也今中倉積

粟數百千萬東人戰士一當百餘入則言笑晏晏出則步武涼州吞磨咀業綽有餘暇但與卿形雖君臣心過父子朕欲全卿名節不使貽笑將來卿三思之軌不答龍飛三年春二月楊軌以司馬郭緯為西平相率步騎二萬北赴郭磨禿髮儁檀亦率騎一萬助之軌至姑臧營於城北三月太原公纂將兵擊軌郭磨帥衆來救纂敗引還段業使沮渠蒙遜攻西郡執其太守呂純純光之弟子也於是晉昌燉煌等郡並降於業夏六月楊軌

自恃士馬之盛議欲與光大決成敗麋每以天文裁止之常山公弘鎮張掖使輔國將軍沮渠男成及酒泉太守王德來攻光遣太原公纂迎之軌謀于衆曰呂弘精兵一萬若與纂合則敵強我弱養獸不討將為後患乃與禿髮利鹿孤共邀纂纂與戰大破之軌奔王乞基郭麋聞軌敗東走魏安降於乞伏乾歸常山公弘為業所攻引兵棄張掖東走業將兵追弘弘擊敗之業遂城西安以別將臧莫孩為太守太原公纂又擊敗之冬十

月建武將軍李鸞以興城降於禿髮烏孤

龍飛四年夏五月太子紹太原公纂將兵伐段業業乞救於禿髮烏孤烏孤遣驃騎利鹿孤及楊軌救之紹以業等軍盛欲從三門關挾山而東纂曰挾山示弱取敗之道不如結陣衝之彼必憚我而不戰也紹乃引軍而南業案兵不動紹等亦引而還秋九月光寢疾冬十二月光疾甚立太子紹為天王自號太上皇帝以太原公纂為太尉常山公弘為司徒謂紹曰吾疾病唯增恐將

不濟今國家多難三寇闕閭迭伺國隙吾歿之後使纂  
統六軍弘管朝政汝恭已無為委重二兄庶幾可濟若  
內相猜貳釁起蕭牆則晉趙之變旦夕至矣又謂纂弘  
曰永業才非撥亂直以立嫡有常猥居元首今外有強  
寇人心未寧汝兄弟緝穆則祚流萬世若內自相圖則  
禍不旋踵纂弘泣曰不敢有異心又執纂手戒之曰汝  
性粗暴深為吾憂開基既難守成不易善輔永業勿聽  
讒言是日光卒時晉安帝隆安三年也光年六十三在

位十四年偽謚懿武皇帝廟號太祖墓號高陵

十六國春秋卷八十一

欽定四庫全書

十六國春秋卷八十二

後涼錄二

呂紹

呂紹字永業光之嫡子也麟嘉元年與母石氏至自仇池遂立為世子光僭即天王位進為太子光死紹秘不發喪庶兄太原公纂乃排閣而入哭之盡哀拂衣欲出紹懼為纂所害以位讓之曰兄功高年長宜承大統願

兄勿疑篡曰臣雖年長陛下國家之冢嫡也臣安敢奸之不可以私愛而亂大倫紹固讓篡篡不許紹遂嗣偽位驍騎將軍呂超言於紹曰篡統戎積年威震內外臨喪不哀步高視遠觀其舉止似亂常度恐成大變宜早除之以安社稷紹曰先帝顧命言猶在耳奈何棄之且兄弟至戚寧有此乎吾以弱年負荷大任方賴二兄以寧國家縱其圖我我視死如歸終不忍有此意也卿慎勿言超曰篡威名素著安忍無親今不圖之後必噬臍

矣紹曰吾每念袁尚兄弟未嘗不痛心切齒忘寢與食  
寧坐而死豈忍行之超曰聖人稱知幾其神陛下臨機  
不斷臣見大事去矣既而纂見紹于湛露堂超執刀侍  
側目纂請收之紹不許纂遂與常山公弘率壯士數百  
攻紹紹登紫閣自殺追謚隱王先是光未亡時有鬼叫  
於都街曰兄弟相滅百姓弊徼吏尋視之則無所見其  
年光死紹立五日為纂所殺

呂纂

呂纂字永緒光之庶長子也母趙淑媛纂性粗暴少便弓馬好鷹犬苻堅時入太學不好讀書唯以交結公侯聲樂為務太安元年堅亂西奔上邽轉至姑臧拜虎賁中郎將秦州刺史封太原公先是光欲立弘為世子會聞紹在仇池乃止弘既有憾于紹遣尚書姜紀密告纂曰先帝登遐主上闇弱未堪多難兄總攝內外威恩素著宜為社稷計不可徇小節也輒欲遠追廢昌邑之義以兄為中宗何如纂從之於是夜率壯士數百踰北城

攻廣夏門弘率東苑之衆斫洪範門左衛將軍齊從守  
融明觀抽劍斫纂不中被擒紹遣武賁中郎開率禁兵  
拒戰于端門驍騎將軍虎率衆二千赴難衆素憚纂皆  
不戰自潰纂入自青角門升謙光殿紹自殺於紫閣超  
出奔廣武纂憚弘兵強以位讓弘弘曰向以紹弟也而  
承大統衆心不順是以違先帝遺命而廢之慙負黃泉  
今復踰兄而立豈弘之本志乎復何面目以視息世間  
大兄長且賢威名振于二寇宜速即大位以安國家纂

乃使弘出告衆曰先帝臨終受詔如此羣臣皆曰苟社稷有主誰敢違者遂僭即天王位大赦境內改元咸寧尊嫡母石氏為王太后生母趙氏為太后署常山公弘為使持節侍中大都督都督中外諸軍事大司馬車騎大將軍司隸校尉錄尚書事改封番禾郡公其餘封拜各有差叔父征東將軍方鎮廣武纂遣使謂方曰超實忠臣義勇可嘉但不識國家大體權變之宜方賴其忠節誕濟世難卿可以此意諭之超乃上疏陳罪纂復其

爵位

咸寧二年春三月大司馬番禾公弘自以功名崇重恐不為纂所容纂亦以弘功高地逼深忌嫉之弘以東苑之兵作亂劫尹文楊桓以為謀主請宗變俱行變固辭之遂率兵攻纂纂遣將軍焦辨擊之弘衆潰出奔廣武纂縱兵大掠悉以東苑婦女賞軍弘之妻女亦為士卒所辱纂笑謂羣臣曰今日之戰何如侍中房晷對曰天禍涼室釁起戚藩先帝始崩隱王以幽逼致殂山陵甫

訖大司馬以驚疑肆逆京邑流血昆弟接办雖弘自取  
夷滅亦由陛下無棠棣之恩宜省己責躬以謝百姓而  
反縱兵大掠囚辱士女釁自弘起百姓何罪且弘妻陛  
下之弟婦弘女陛下之姪女也奈何使無賴小人汚辱  
為婢妾天地神明豈忍見此因歔歔悲泣纂改容謝之  
乃召弘妻及男女置於東宮厚撫之弘將奔禿髮利鹿  
孤道過廣武詣征東將軍方方見之大哭曰天下甚寬  
汝何為至此乃執弘繫獄馳使告纂纂遣力士康龍就

拉殺之是月立妃楊氏為皇后以后父桓為散騎常侍  
尚書左僕射涼都尹封金城侯夏四月纂將伐禿髮利  
鹿孤中書令楊穎諫曰夫起師動衆必參之天人苟非  
其時聖賢所不為也利鹿孤上下用命國未有釁不可  
以伐今宜繕甲養銳勸課農桑待可乘之機然後一舉  
蕩滅比年多事公私罄竭不深根固本恐為患將來願  
抑赫斯之怒思萬全之策纂不從遂帥衆度浩亶河利  
鹿孤遣弟傉檀來拒戰於三堆纂衆敗績失士卒二千

餘人六月纂將西襲張掖尚書姜紀諫曰方今盛夏農  
事方殷百姓廢農所利者少所喪者多若師至嶺西虜  
必乘虛寇掠都下將若之何宜且迴師以為後計纂曰  
虜無大志聞吾西征正可自固耳今速襲之可以得志  
遂進圍張掖略地建康偃檀聞之帥萬騎襲姑臧纂弟  
隴西公緯憑北城以自固偃檀曜兵于青陽門虜掠八  
千餘戶而去纂聞之引還秋九月征東將軍方率廣武  
民三千餘戶奔利鹿孤是年有猪生子一身三頭又有

龍出東廂井中到殿前蟠卧比旦失之纂以為美瑞號  
大殿為龍翔殿又有黑龍行于當陽九宮門改為龍興  
門鳩摩羅什獨以為災言於纂曰比日潛龍出游豕妖  
見異龍者陰類出入有時而今屢見則為災青將有下  
人謀上之變宜克己修德以答天戒纂不納涼州一作  
不知人胡據一作胡盜發張駿墓見駿貌如生得真珠  
何解安枚簾箔雲母屏風琉璃榼白玉樽受三升赤玉簫紫玉笛  
珊瑚鞭馬瑙鍾黃金勒水陸奇珍不可勝紀纂誅據黨

五十餘家遣使吊祭駿并繕修其墓

咸寧三年春二月纂昏虐任情游田無度荒耽酒色不恤政事太常楊穎諫曰臣聞皇天降監惟德是與德由人弘天應以福故勃焉之美奄在聖躬大業已爾當以道守之廓靈基于日新邀洪福于萬世自陛下龍飛疆宇未闢崎嶇二嶺之內網維未振於九州陛下不兢兢夕惕經略四方以成先帝之遺志拯蒼生於荼毒一作蓼而更飲酒過度出入無恒宴安游盤之樂沈湎樽酒之

間不以寇讐為慮臣竊危之糟丘酒池洛汭不返皆陛下之殷鑒臣蒙先帝夷險之恩故不敢避干將之戮纂謝曰朕之罪也不有直亮之臣誰匡邪僻之君然昏虐自任雖有此諫終不能改常與左右因醉騁馳遊獵或馬奔於坑塹之間殿中侍御史王回中書侍郎王儒控馬諫曰千金之子坐不垂堂萬乘之主清道而行奈何去輿輦之安冒奔馳之危銜檠之變動有不測之禍愚臣竊所未安敢以死爭願陛下遠思

遠思二字段龜龍涼州紀作宜憶

袁盎攬轡之言不令臣等受譏千載纂不納纂番禾太  
守超擅擊鮮卑思盤思盤遣弟乞珍訴超於纂纂召超  
及思盤皆入朝超至姑臧大懼深自結於殿中監杜尚  
纂見超怒責之曰卿恃兄弟桓桓乃敢欺吾要當斬卿  
天下乃定超頓首曰不敢纂本以恐喝超實無意殺之  
因引起思盤及諸臣同讌於內殿超兄中領軍隆屢勸  
纂酒已至昏醉乘步輓車將超等遊禁內至琨華堂東  
閣車不得過纂親將竇川駱騰倚劍於壁推車過閣超

取劍擊纂纂下車擒超超刺纂洞胷奔於宣德堂川騰  
與超格戰超殺之纂妻楊氏命禁兵討超杜尚止之皆  
納兵舍仗將軍魏益多斬取纂首以徇曰纂違先帝之  
命殺太子而自立荒耽酒獵昵近小人輕害忠良以百  
姓為草芥番禾太守超以骨肉至親懼社稷顛覆順人  
心而除之上以安宗廟下為太子報仇凡我士庶同茲  
休慶纂在位三年死纂未死時嘗與鳩摩羅什博戲或  
共圍棋殺羅什子曰斫胡奴頭羅什曰不能斫胡奴頭

胡奴將斫人頭此言有為而篡不能悟光弟寶有子名  
超小字胡奴竟以殺篡終如什言隆篡位偽謚篡為靈  
皇帝墓號白石陵

十六國春秋卷八十二

欽定四庫全書

十六國春秋卷八十三

後涼錄三

呂隆

呂隆字永基光弟右將軍寶之子也美姿貌善騎射光  
末年拜北部護軍稍歷顯位聲稱並著超既殺纂讓位  
於隆隆有難色超曰今如乘龍上天豈得中下隆遂以  
晉安帝隆安五年春二月僭即天王位超先以番禾得

小鼎以為神瑞大赦境內殊死以下改元神鼎追尊父寶為文皇帝母衛氏為皇太后妻楊氏為皇后以弟起有佐命之勲拜使持節侍中都督中外諸軍事輔國大將軍司隸校尉錄尚書事封安定公二月右僕射楊桓奔河西利鹿孤任為左司馬利鹿孤率衆來攻隆與戰敗績掠其民二千餘戶而去夏五月隆殘虐無度多殺豪望以立威名內外囂然人不自保魏安人焦朗遣使說秦隴西公姚碩德曰呂氏因秦之亂制命此州自武

皇棄世兄弟相攻德刑不恤殘暴是先饑饉流亡死者  
過半唯泣訴昊天而精誠無感伏惟明公道邁前賢任  
尊分陝宜兼弱攻昧經略此方救生靈之沈溺布徽政  
於玉門篡奪之際為功不難不可失也乃遣妻子為質  
碩德遂率步騎六萬來伐秋七月碩德自金城渡河直  
趨廣武至姑臧隆遣輔國大將軍趙龍驤將軍邈等出  
戰大敗遁還邈為碩德所擒所失萬計隆收集離散嬰  
城固守巴西公他率東苑之衆二萬五千降秦閏月時

熒惑犯帝座有雀羣鬪於太廟死者數萬姑臧受圍累月東方之人在城中者多謀外叛將軍魏益多又唱動羣心乃謀殺隆起事發誅之連坐死者三百餘家於是羣臣表求與秦通和隆弗許安定公超諫曰通塞有時艱泰相襲孫權屈身於魏譙周勸主迎降豈非大丈夫哉勢屈故也天錫承七世之資樹恩百載武旅十萬謀士盈朝秦師臨境識者導以見機若懷諫自專社稷為墟前鑒不遠我之元龜何憚尺書單使不以危易安且

令卑辭以退敵敵去之後內修德政廢興由人何損大  
略隆曰吾雖常人屬當國家之重不能嗣守成基保安  
社稷乃以太祖之業委之於人復何面目見先帝于地  
下乎超曰應龍以屈伸為靈聖人以知機為美今連兵  
積歲糧儲內竭強寇外逼百姓嗷嗷無餬口之計

一作寄

假使張陳韓白亦復無如之何陛下當思權變屈伸割  
區區常慮若卜世未窮何憂舊業之不復苟天命去矣  
亦可以保全宗族不然坐守困窮終將何如隆乃從之

九月遣使請降于秦秦遣鴻臚桓敦拜隆為使持節鎮西大將軍都督河西諸軍事涼州刺史建康公優詔嘉美之于是遣母弟愛子文武舊臣慕容筑楊穎史難閭松等五十餘家入秦為質碩德乃還冬十二月安定公超攻姜紀不剋遂攻焦朗於魏安朗遣弟子嵩為質於河西王利鹿孤利鹿孤遣傳檀來援比至超已退傳檀乃耀兵姑臧壁於胡阮超夜遣中壘將軍王集帥精騎二千斫營傳檀縱兵逆擊集被殺失兵士三百餘人隆

懼偽與偃檀通好請於苑內結盟偃檀遣鎮北俱延入盟延疑有伏毀苑牆而出伏兵擊之延失馬步還偃檀怒遂攻昌松太守孟禕於顯美隆遣廣武將軍苟安國寧遠將軍石可率騎五百救之安國等憚偃檀之強遁還偃檀遂剋顯美執孟禕而去

神鼎二年春二月興遣兼散騎常侍席確來觀虛實因徵隆弟超為質沮渠蒙遜率衆來伐隆遣使求救於河西王利鹿孤利鹿孤遣車騎大將軍偃檀率衆一萬救

之未至隆擊敗之蒙遜請與結盟留穀萬餘斛以賑饑  
人是時姑臧大饑穀價踴貴斗米直錢五千文人相食  
餓死者十餘萬口城門晝閉樵採路絕百姓請出城乞  
為傭作奴婢者日有數百隆惡其沮動衆心盡坑之積  
尸盈於路衢戶絕者十有九焉冬十月河西王傉檀復  
攻隆於姑臧

神鼎三年秋七月河西王傉檀及沮渠蒙遜互出兵來  
攻隆以二寇之逼念姑臧終無以自存乃遣超率騎二

百多齎珍寶請迎於秦姚興遂遣徐難等率步騎四萬  
來迎軍至姑臧隆素車白馬迎於道旁難以司馬王尚  
行涼州刺史配兵三千權鎮姑臧分置守宰以戍倉松  
番禾二城隆使呂胤告光廟曰陛下往運神略開建西  
夏德被蒼生威振遐裔枝嗣不臧迭相篡弑二虜交逼  
將歸東京謹與陛下奉訣於此欷歔慟泣酸感興軍隆  
遂率宗族僚屬及民一萬戶隨難東遷既至長安興以  
隆為散騎常侍尚書公如故超為安定太守文武三十

餘人皆擢叙之初郭磨常言代呂者王故其起兵先推王詳後推王乞基及隆東遷王尚卒代之終如磨言其後隆坐與姚興子廣平公弼謀反為興所殺呂光以孝武太元十一年歲在丙戌據涼州十五年至隆滅亡歲在癸卯凡十八年以安帝元興二年滅

十六國春秋卷八十三

欽定四庫全書

十六國春秋卷八十四

後涼錄四

呂緯

呂緯纂之弟也封隴西公鎮北城初禿髮傉檀率衆襲姑臧緯固守北城兵不得入及纂為超等所害或說緯曰超陵天逆上士衆不附明公以介弟之親仗大義之名投戈而起且姜紀焦辯在南城楊桓田誠在東苑皆

吾黨也何患不濟緯遂嚴兵謂叔父巴西公他日隆超弑逆所宜擊之昔田氏之亂孔子鄰國之臣猶抗言於哀公況今蕭牆有難而可坐觀乎他將從之他妻梁氏止之曰緯超俱兄弟之子何為舍超助緯自為禍首乎他乃謂緯曰超舉事已成據武庫擁精兵圖之甚難且吾老矣無能為也超聞登城告他曰篡信讒言將滅超兄弟超以身命之切且懼社稷覆亡故出萬死之計為國家唱義叔父當有以亮之超弟邈有寵於緯因說緯

曰纂殘國破家誅戮兄弟隆超此舉應天之心正欲  
尊立明公耳方今明公先帝之長子當主社稷四海顓  
顓人無異議隆超雖不達臧否終不以孽代宗更圖異  
望也願公勿疑緯信之乃與隆超結盟單馬入城超執  
而殺之他尋叛降于秦

呂訓

呂訓光子也光征西域留於仇池其後仕楊難當為建  
忠將軍王師北伐訓衛倉儲以俟既剋難當署為駙馬

都尉奉朝請徙居內郡

光妻石氏

光妻石氏略陽氏人也初光之征西域留石氏於仇池麟嘉元年光僭稱涼王於姑臧石氏與子紹及弟德世來自仇池光乃迎於城東遂冊立為王后纂後纂位尊為王太后

纂妻楊氏

纂妻楊氏弘農人尚書右僕射楊桓之女也咸寧元年

立為皇后楊氏美艷有義烈纂為超所刺楊氏命禁兵  
討之殿中皆其黨與莫有應者將軍魏益多入斬纂首  
楊氏泣曰人已死如土石無所復知何忍復殘其形骸  
乎益多罵之楊氏與婢十數人殯纂于城西將出宮超  
恐其挾珍寶出外使人搜索之楊氏厲聲責曰爾兄弟  
不能和睦手必相屠我旦夕死人用金寶何為超慚而  
退又問楊氏玉璽所在楊氏怒曰已毀之矣超見其有  
色欲納之謂其父桓曰后若自殺禍及卿宗桓以言告

楊氏楊氏曰大人本賣女與氏以圖富貴一之已甚其  
可復使女辱于二氏乎桓不能強遂自殺謚曰穆后

紹美人張氏

張氏燉煌人本隱王紹之美人也清辨有操行姿色壯  
麗年十四紹見殺便請為沙門隆見而悅之欲汚其行  
遣中書郎裴敏說之張氏善言名理敏為之屈隆親逼  
之張氏斂衽曰欽樂至道故投身空門恐一旦辱於人  
誓不改節今見逼如此豈非命也於是升門樓自投于

地二踵俱折口誦佛經顏色自若俄然而卒

呂憲妻符氏

呂憲纂之從叔也為建節將軍遼東太守妻符氏年十五有姿色憲卒自殺

郭磨

郭磨西平人也少明式易善天文占候仕郡主簿張天錫末年符氏每有西伐之問太守趙凝使磨筮之磨曰若郡內二月十五日失囚者東軍當至涼祚必終疑乃

申約屬縣至十五日鮮卑折掘送馬於凝凝疑其非駿  
幽之內厩鮮卑懼而夜遁凝以告磨磨曰是也國家將  
亡不可復久苻堅末年當陽門震涼州刺史梁熙問磨  
曰其祥安在磨曰為四夷之事也當有外國二王來朝  
主上一當反國一死此城歲餘而鄯善及前部王朝於  
苻堅前部王西歸鄯善王死於姑臧及光王河西西海  
太守王楨以郡叛磨勸光襲之光左丞寶曰千里襲人  
自昔所難況王者之師天下所聞何可僥倖以邀成功

磨不可從誤人大事磨曰若其不捷磨自伏鈇鉞之誅  
如其剋也左丞為無謀矣光從而剋之遂比之京管叅  
預機密遷散騎常侍兼太常光將伐乞伏乾歸磨諫曰  
今太白未出不宜行師往必無功終當覆敗太史令賈  
曜以為必有秦隴之地及克金城光使曜詰磨磨密謂  
曜曰昨有流星東墜當有伏尸死將雖得此城憂在不  
守正月上旬河冰將解若不早渡恐有大變後二日而  
敗問至光引軍渡河既訖冰泮國人服其神驗甚信重

之後以光年老知其將敗會熒惑守東井謂僕射王詳

一作祥

曰於天文涼之分野將有大兵且主上老病太子

沖闇太原公纂等凶悍一旦不諱禍亂必起以吾二人  
久居內要彼常切齒將為誅首恐禍及人深宜慮之田  
胡王乞基部落最強二苑之人多其故衆吾今欲與公  
共唱大義推乞基為主則二苑之衆盡為我有剋城之  
後徐更議之詳以為然磨遂以二苑之衆夜燒洪範門  
使詳為內應事洩磨據東苑以叛百姓聞磨起兵皆言

聖人起事事無不成故相率從之如不及旬日之間有衆數千光孫八人年幼悉在乳母抱中先在東苑磨之叛也悉虜而獲之及纂擊破磨軍磨恚甚盡投王孫於鋒刃之上枝分節解飲其血以盟衆覩者盡皆掩目寒心不忍視之而磨悠然自若遂與光相持時有逃人奔於磨稱呂統病死磨曰未也光統之命盡在一時後統死三日而光死磨嘗曰涼州謙光殿當有索頭鮮卑居之其後禿髮傳檀沮渠蒙遜迭據姑臧終如磨言磨性

編酷不為士庶所附戰敗奔降西秦乾歸敗入仕姚興為太史令磨以滅姚者晉遂將妻子南奔為追兵所殺

杜進

杜進略陽氏也初為光祿將從伐西域討平龜茲及光引還涼州刺史梁熙責光擅命還師遣子胤率眾來拒光遣進等為前鋒迎擊胤將麾下數百騎來奔進追擒之胡夷款附光之定河西也進功居多表為輔國將軍武威太守封武始侯進既居都尹權高一時出入羽儀

與光相亞光甥石聰至自關中光曰中州人言吾政化何如聰曰但聞有杜進耳實不聞有舅也光默然因此誅進

張資

張資仕光為中書監博學多才藝文翰溫雅光甚器之資病光博營救療有外國道人羅義云能差資病光喜給賜甚厚鳩摩羅什知義誑詐乃告資曰義不能為益徒煩費耳冥運雖隱可以事試也遂以五色絲作繩結

之燒為灰末投之水中灰若出水還成結者病不可愈  
須臾灰聚浮出復繩本形義療無效少日資死光悼惜  
之

任射

任射者光時得罪自匿為王欣家奴發覺應死射有奇

巧王爾

一作肅

魯般之儔也故赦之及大殿歲久傾敗光

募能正者射運巧致思不煩大工土木俱正

竇苟

竇苟略陽氏也以壯勇知名從光攻龜茲登雲梯入地道或時墮落蘇而復上光深奇之後以強弩將軍從中郎將方攻乞伏乾歸又從太原公纂率步騎五千南討彭奚念皆無所獲光親討乾歸苟又從纂率步騎三萬攻拔金城以功遷左衛將軍賜爵關內侯

侯瑾

侯瑾字子瑜能解鳥語光大安三年常出門見白雀巢陽川與黑雀列行慨然歎曰今天下大亂君子小人相

共居焉遂去不知所之

齊從

齊從魏安人也仕光為左衛將軍守融明觀紹初嗣立  
纂與弘率壯士攻洪範門從逆問之曰誰也衆曰太原  
公從曰國有大故主上新立太原公行不由道夜入禁  
城將為亂耶因抽劍直前斫纂中額纂左右擒之纂曰  
義士也赦之勿殺及即偽位謂從曰卿前所我一何甚  
也從泣曰隱王先帝所立陛下雖應天順時而微心未

達此時惟恐陛下不死何謂甚也纂嘉其忠因善遇之


### 宋歆

宋歆姑臧人也仕為燉煌太守以德惠下境內肅清乃結同心之梨歆詣酒泉獻之光嘉其美瑞賞帛五十疋

### 宗變

宗變燉煌人仕纂為騎都尉尚書僕射大司馬弘起兵東苑劫尹文楊桓為謀主請變俱行變曰老臣受先帝大恩位為列棘不能隕身授命死有餘罪而復從殿下

親為戎首者豈天地所容乎且臣耄矣智不能謀衆不足恃將焉用之弘曰君為義士我為亂臣乃止



十六國春秋卷八十四

欽定四庫全書

史部

十六國春秋卷

八十五至  
九十一

詳校官編修臣范來宗

侍讀臣孫球覆勘

覆校官修撰臣陳初哲

校對官中書臣潘庭筠

謄錄監生臣薛振基

欽定四庫全書

十六國春秋卷八十五

西秦錄一

乞伏國仁

乞伏國仁隴西鮮卑人也其先有如弗斯引出連叱盧三  
部自漠北南出太陰山遇一巨蟲於路狀若神龜大如陵  
阜乃殺馬而祭之祝曰若善神也便當開路若惡神也遂  
塞不通俄而不見乃有一小兒在焉時又有乞伏部有老父

無子者請養為子衆咸許之老父欣然自以為有所依憑字之曰紇干紇干者夏言依倚也年十歲驍勇善騎射彎弓五百斤四部服其雄武推為統主號之曰乞伏可汗託鐸莫何託譯者言非神非人之稱也其後國仁五世祖祐隣者晉泰始初率戶五千遷於夏緣部衆稍盛鮮卑鹿結七萬餘落屯於高平川與祐隣迭相攻擊鹿結敗南奔畧陽祐隣盡并其衆因居高平川祐隣死子結權立徙於牽屯結權死子利那立擊鮮卑吐賴於烏樹山討尉遲渴權於大非川并收其衆

三萬餘落利那死弟初渥立初渥死利那子述延立討  
鮮卑莫侯於苑川大破之降其衆二萬餘落因居苑川  
侵併隣部士馬強盛以叔父軻渥為師傅委以國政弗  
斯引烏渥為左輔將軍鎮蔡園川出連高胡為右輔將  
軍鎮至便川叱盧那胡為率義將軍鎮牽屯山述延死  
子儻大寒立會石勒滅劉曜懼而遷於麥田無孤山  
作元大寒死子司繁立秦皇始中遷於度堅山建元七  
孤山年秦將益州刺史王統來伐司繁帥騎三萬拒統於苑

川統潛襲度堅山部衆五萬餘落悉降於統司繁歎謂  
左右曰智不拒敵德不撫衆劍騎未交而本根已敗見  
衆分散勢亦難全若奔諸部必不我容吾將為呼韓邪  
之計矣乃擁部落亦詣統降堅堅大悅署為南單于畱  
之長安以司繁從叔吐雷為勇士護軍撫其部衆俄而  
鮮卑勃寒侵斥隴右堅以司繁為使持節都督征討西  
胡諸軍事鎮西將軍討之勃寒懼而請降遂使司繁鎮  
勇士川甚有威惠司繁卒子國仁立堅興壽春之役微

為前將軍領先鋒騎會國仁叔父步頽叛於隴右堅遣  
國仁還討之步頽聞之大喜迎國仁於路國仁置酒高  
會攘袂大言曰苻氏徃因趙石之亂遂妄竊名號窮兵  
黷武跨僭八州疆宇既寧宜綏以德方虛廣威聲勤心  
遠畧騷動蒼生疲敝中國違天怒人將何以濟且物極  
則虧禍盈而覆者天之道也以吾量之是役也難以免  
矣吾當與諸君共成一方之業及堅敗歸國仁遂迫脅  
部落有不從者擊而併之衆至十餘萬

建義元年苻堅為姚萇所殺國仁謂其豪帥曰苻氏以  
高世之資而困於烏合之衆可謂天也夫守常迷運先  
達恥之見機而作英豪之舉吾雖薄德藉累世之資豈  
可覩時來之運而不作乎遂以晉孝武太元十年自稱  
大都督大將軍大單于領秦河二州牧改秦建元二十  
一年為建義元年署置官屬以其將乙旃童童一作音為  
左相屋引支出支為右相獨孤匹蹄為左輔武羣勇士為  
右輔弟乾歸為上將軍自餘拜授各有差乃分其地置

武城武陽安固武始漢陽天水畧陽潏川甘松匡明白  
馬苑川十二郡築勇士都城以居之鮮卑匹蘭帥衆五  
千來降

建義二年春正月南安祕宜帥諸羌胡五萬餘人來擊  
四面而至國仁謂諸將曰先人有奪人之心不可坐待  
其至宜抑威餌敵羸師以張之軍法所謂怒我而怠寇  
也於是勒衆五千襲其不意大敗之祕宜奔還南安秋  
七月祕宜與其弟莫侯悌眷率衆三萬餘戶來降國仁

拜秘書鎮東將軍東秦州刺史悌眷鎮南將軍南梁州刺史

建義三年春三月秦苻登遣使署國仁使持節大都督都督雜夷諸軍事大將軍大單于苑川王夏五月國仁帥騎三萬襲鮮卑大人密貴裕苟提倫等三部於六泉秋七月高平鮮卑沒弈干東胡金熙連兵來襲相遇于渴渾川大戰敗之斬級三千獲馬五千疋沒弈干及熙奔還三部振懼率衆迎降署密貴為建義將軍六泉侯

裕苟為建忠將軍蘭泉侯提倫為建節將軍鳴泉侯是  
年國仁造刀一口銘曰建義隸書

建義四年春三月國仁建威將軍叱盧烏孤跋擁衆叛  
保牽屯山國仁率騎七千討之斬其部將叱羅侯降者  
千餘戶跋大懼請降復其官爵夏四月討鮮卑越質叱  
黎於平襄大破之獲其子詰歸弟子復半及部落五千  
餘人而還六月國仁死在位四年偽謚宣烈王廟號烈  
祖

乞伏乾歸

乞伏乾歸國仁之弟也雄武英傑沈雅有度畧國仁死  
羣臣咸以國仁子公府尚幼宜立長君共推乾歸為大  
都督大將軍大單于河南王大赦境內改元太初秋七  
月立妻邊氏為王后署置百官倣漢制以南川侯出連  
乞都為丞相鎮南將軍南梁州刺史悌眷為御史大夫  
金城邊芮為左長史東秦州刺史祕宜為右長史武始  
翟勅為左司馬翟瑄為右司馬畧陽王松壽為主簿從

第軻彈為梁州牧第益州為秦州牧屈眷為河州牧自餘封拜各有差九月乾歸遷都金城

太初二年春正月秦苻登遣使署乾歸為大將軍大單于金城王時晉太元十四年也夏四月南羗獨如率眾七千來降休官阿敦侯年二部各擁五千餘落據牽屯山為其邊害乾歸討破之悉降其眾於是聲振邊疆鮮卑豆留鞬叱豆渾及南丘鹿結并休官曷呼奴盧水尉地拔竝率眾來降乾歸皆署其官爵冬十一月枹罕羗

彭奚念帥衆來附乾歸以奚念為北河州刺史

太初三年夏四月吐谷渾王視連遣使稱臣於乾歸貢其  
方物乾歸拜視連為沙州牧白蘭王秋九月視連死子視  
羅立視羅英果有雄畧以其父祖慈仁為四隣所侵嘗從  
容謂博士竊苞曰易云動靜有常剛柔斷矣先王以仁  
宰世不任威刑所以剛柔靡斷取輕隣敵當仁不讓豈  
宜拱默者乎今將秣馬厲兵爭衡中國先生以為何如  
苞曰大王之言高世之畧秦隴英豪所願聞也於是虛

襟撫納衆赴如歸冬十月乾歸遣使拜視羆為使持節  
都督罷涸已西諸軍事沙州牧白蘭王視羆不受謂使  
者曰自晉道不綱姦雄競逐劉石虐亂秦燕跋扈河南  
王處形勝之地宜當糾合義兵以懲不順奈何私相假  
署擬僭羣克寡人承五祖之休烈控弦之士二萬方欲  
掃氛秦隴清彼沙涼然後飲馬涇渭戮問鼎之豎以一  
丸泥封東關閉燕趙之路迎天子于西京以盡遐藩之  
節終不能如季孟子陽妄自尊大為吾白河南王何不

立勲帝室策名王府建當年之功留芳來葉耶使還言之乾歸大怒然憚其疆猶與結好十一月隴西太守越質詰歸據平襄叛自稱建國將軍右賢王

太初四年春正月乾歸率衆擊詰歸敗之詰歸東奔隴山旣而擁衆來降乾歸以宗女妻之署立義將軍秋七月秦苻登驃騎將軍沒奕干遣使結好以二子為質請共擊鮮卑大兜國乾歸許之遂與沒奕干攻大兜于安陽城大兜退固鳴蟬堡乾歸攻陷之大兜微服遁走收

其部衆而還歸沒奕干二子沒奕干尋叛東合劉衛辰  
八月乾歸率騎一萬討沒奕干沒奕干奔他樓城乾歸  
射之中目冬十月三河王呂光遣弟右將軍呂寶乘虛  
攻金城乾歸聞之引還為寶所襲敗於鳴雀峽退屯青  
岸

太初五年秋八月呂寶進攻乾歸乾歸使北河州刺史  
彭奚念斷其歸路躬貫甲冑連戰敗之寶及將士投河  
死者萬餘人光又遣子虎賁中郎將呂纂襲擊彭奚念

纂復敗績奔遁

太初六年春正月休官權千成為秦所逼遣使請降乾歸署為東秦州刺史休官大都統顯親公夏六月乾歸立其子熾磐為太子熾磐勇畧明決過於其父

太初七年春正月秦苻登遣使署乾歸假黃鉞大都督都督隴右河西諸軍事左丞相大將軍河南王領秦梁益涼沙五州牧加九錫之禮夏六月苻登為姚興所逼遣其子汝陰王崇為質於乾歸請救進封乾歸梁王命

置官司納其妹東平長公主為梁王后乾歸遣前將軍  
乞伏益州冠軍將軍翟瑄率騎士二萬救之聞登為秦  
所殺引還冬十月秦苻崇為乾歸所逐奔隴西王楊定  
定畱司馬邵彊守秦州率步騎四萬與崇共攻乾歸乾  
歸遣涼州牧軻彈秦州牧益州立義將軍詰歸率騎三  
萬拒之具翟瑄傳益州與定戰敗於平川軻彈詰歸欲引兵  
退冠軍翟瑄奮劍止之軻彈率騎往赴益州詰歸亦勒  
兵繼進定遂大敗斬定及崇首虜萬七千級於是盡有

隴西巴西之地

太初八年春正月乾歸自稱秦王赦其境內殊死已下  
以太子熾磐領尚書令出連乞都為丞相左長史邊芮  
為尚書左僕射右長史祕宜為右僕射翟瑄為吏部尚  
書翟勅為主客尚書杜宣為兵部尚書王松壽為民部  
尚書樊謙為三公尚書方弘勰景為侍中自餘拜授皆  
如魏武晉文故事然猶稱大將軍大單于邊芮等領府  
佐如故夏四月索虜禿髮如苟率戶二萬來降乾歸妻

以宗女六月遷都於西城秋七月三河王呂光率衆十萬來伐左輔將軍密貴周右衛將軍莫者殺牴言於乾歸曰光旦夕將至陛下以命世雄姿開業洮罕剋剪羣凶威振遐邇將鼓淳風於東夏建八百之鴻慶不忍小屈與姦豎競於一時若機事不捷恐非國家之利也宜遣愛子以退之乾歸乃稱藩於光遣子勅勅載記作勅勅質旣而悔之殺貴周及殺牴

大初九年春正月休官權萬世帥衆來降冬十月涼州

牧乞伏軻彈與秦州牧乞伏蓋州不平軻彈奔涼是歲  
乾歸所署立義將軍越質詰歸帥戶二萬叛降於秦顯  
親公權千成帥衆攻秦上邽不克退保畧陽姚頤德擊  
之千成亦降

太初十年春正月涼王呂光以乾歸數反覆舉兵來伐  
使呂延爲前鋒羣臣咸勸其東奔成紀以避其銳乾歸  
不從謂諸將曰昔曹孟德敗袁本初於官渡陸伯言摧  
劉玄德於白帝皆以權畧取之軍之勝敗在於巧拙不

在衆寡光雖舉全州之軍而無經遠之畧不足憚也且其精銳盡在呂延勇而無謀易以奇策制之延軍若敗光亦遁還乘勝追奔可以得志衆咸曰非所及也二月光軍於長最遣子呂纂帥步騎三萬攻金城乾歸率衆二萬救之未至纂等拔金城光別將梁恭等以甲卒萬餘出陽武下峽與秦州刺史沒奕干攻其東以為犄角之勢呂延以抱罕之衆攻陷臨洮武始河關乾歸泣謂諸將曰今事勢窮蹙逃命無所死中求生正在今日

涼軍雖四面而至然相去遼遠山河旣阻力不周接敗  
其一軍衆軍自退乃縱反間紿延稱秦王乾歸衆潰東  
奔成紀延信之引騎輕進遂大敗之斬延於陣夏六月  
乾歸徵北河州刺史彭奚念為鎮衛將軍以鎮西將軍  
屋列破光一作屋弘為河州牧定州刺史翟瑄為晉興太守  
鎮枹罕冬十月秦長水校尉姚珍來奔乾歸以女妻之  
太初十一年春正月乾歸遣秦州牧益州攻涼支陽鷁  
武允吾三部皆克之虜萬餘人而還夏六月禿髮烏孤

遣使來結和親涼散騎常侍郭麇來奔乾歸以爲建忠  
將軍兼散騎常侍秋九月乾歸遣秦州牧益州武衛將  
軍慕容載記作慕容允冠軍將軍翟瑄率騎二萬伐吐谷渾冬  
十月益州等與吐谷渾王視羆戰於度周川大破之視  
羆退保白蘭山遣使謝罪貢其方物以子宕豈爲質乾  
歸以宗女妻之

太初十二年夏四月鮮卑疊掘河內率戶五千自魏來  
降乾歸以河內爲疊掘都統以宗女妻之秋七月丞相

南川宣公出連乞都卒冬十月乾歸以金城太守辛靜  
爲右丞相

太初十三年春正月乙亥乾歸所居金城南景門無故  
自崩甚惡之遂遷都苑川大赦境內夏五月秦姚興遣  
征西姚碩德率衆五萬來伐入自南安峽乾歸率諸將  
拒之次於隴西興復遣別將潛師繼發秋七月乾歸聞  
興將至謂諸將曰吾自開建以來屢摧勦敵乘機藉筭  
舉無遺策今姚興盡中國之師軍勢甚盛山川阻狹無

縱騎之地宜引師平川伺其殆而擊之存亡之機在斯  
一舉諸君勦力勉之若梟剪姚興關中之地盡吾有也  
於是遣武衛將軍慕容元等屯守秦軍樵採路絕秦姚興  
潛引兵來救乾歸聞之復使慕容元率中軍二萬遷屯栢  
陽鎮軍將軍羅敦率外軍四萬遷屯侯辰谷自率輕騎  
數千前候軍勢會大風昏霧遂與中軍相失爲追騎所  
逼入於外軍旦與秦戰爲興所敗遁歸苑川部衆三萬  
六千皆降於秦興進軍枹罕乾歸遂走金城謂諸豪帥

曰吾才非命世謬為諸君所推心存撥亂而德非時雄  
叨竊名號已踰一紀負乘致寇傾喪若斯今衆已散敗  
勢不得安吾欲西保允吾以避其鋒若方軌西邁理難  
俱濟卿等畱此各以其衆降秦保全妻子勿吾隨也羣  
下咸曰昔古公杖策幽人歸懷玄德南奔荆楚襁負分  
岐之感古人所悲況臣等義深父子而有心離背死生  
願從陛下乾歸曰自古無不亡之國不敗之家廢興命  
也苟天未亡我庶幾異日克復舊業復與卿等相見有

期德之不逮何爲俱死公等自愛吾今將寄食於人以  
終餘年乃大哭而別遂帥騎數百馳至允吾乞降於武  
威王利鹿孤利鹿孤遣車騎傳檀迎之置於晉興待以  
上賓之禮秦兵旣退南羗梁弋等密遣使來招乾歸將  
應之其臣屋引阿洛以告晉興太守陰暢暢馳白利鹿  
孤利鹿孤遣弟吐雷率騎三千屯捫天嶺乾歸懼爲利  
鹿孤所殺謂太子熾磐曰吾不能負荷大業致茲顛覆  
以利鹿孤義兼親好異存唇齒之援乃忘義背親謀人

父子忌吾威名勢不全立今姚氏方強吾將歸之若盡  
室俱去必爲追騎所及吾送汝兄弟及汝母爲質彼必  
不疑吾既在長安彼終不敢害汝也於是送熾磐兄弟於  
西平八月乾歸南奔抱罕遂降於秦冬十一月乾歸至  
長安姚興見而大悅署爲持節都督河南諸軍事鎮遠  
將軍河州刺史封歸義侯久之熾磐欲逃詣乾歸武威  
王利鹿孤遣兵追獲將殺之廣武公儁檀勸曰子而歸  
父無足深責宜宥之以示大度利鹿孤從之

太初十四年春二月秦姚興遣乾歸還鎮苑川盡以其  
故部衆配之夏四月乾歸至苑川以邊芮爲長史王松壽  
爲司馬翟勅爲尚書令公卿大將已下悉降號僚佐偏  
裨

太初十五年夏四月熾磐自西平奔歸苑川南京王儼  
檀歸其妻子乾歸使熾磐入朝於秦姚興署爲振忠將  
軍興晉太守尋遣使者加乾歸散騎常侍左賢王

太初十六年秋七月秦遣乾歸以所部甲卒隨齊難等

迎呂隆於河西冬十一月討叛羗党龍頭於滋川拔之  
太初十九年秋九月攻仇池楊盛將苻帛於皮氏堡克  
之盛率兵來救戰於竹嶺爲盛所敗

晉義熙元年春正月

自此以後四年  
並從建康年號

乾歸朝於秦吐谷

渾將大孩

一名烏  
統堤

屢寇乾歸邈境乾歸怒率騎討之大

孩大敗俘斬萬餘口而還大孩走保南京死於胡園視  
羗世子樹洛干帥其餘衆數千家奔歸莫何川自稱大  
都督車騎大將軍大單于吐谷渾王化行所部衆庶樂

業號爲戊寅可汗沙漲雜種莫不歸附乃宣言曰孤先祖避地於此暨孤七世思與羣賢共康休緒今士馬桓桓控弦數萬孤將振威梁益稱霸西戎觀兵三秦遠朝天子諸君以爲何如衆咸曰此盛德之事也願大王自勉乾歸聞而甚忌之秋八月乾歸率衆攻仇池爲楊盛所敗尋復率衆攻盛將楊玉於西陽堡克之

義熙二年秋七月苑川地震裂生毛狐雉入於寢內百草皆自反乾歸甚惡之冬十二月復入朝於秦

義熙三年春正月秦姚興慮乾歸寢強難制終爲西州之患因其朝也畱爲主客尚書以世子熾磐爲建武將軍行西夷校尉監撫其部衆鎮苑川秋七月禿髮儁檀叛秦遣使來邀熾磐斬其使送之長安秦甚嘉之冬十一月秦河州刺史彭奚念叛降禿髮儁檀秦以熾磐行河州刺史

義熙四年夏五月秦遣乾歸以鎮遠將軍從廣平公弼等帥步騎襲儁檀冬十月熾磐以秦政寢衰兵亂將始

且畏秦之攻襲乃招結諸部二萬七千築城於嶮岷山而據之十一月熾磐攻彭奚念於枹罕爲奚念所敗而還

更始元年春三月熾磐入秦見太原公懿於上邽彭奚念乘虛來襲熾磐聞之怒不告懿而歸擊奚念破之遂圍枹罕乾歸從秦王興如平涼熾磐攻枹罕克之遂遣使告乾歸乾歸逃還苑川鮮卑大悅堅有衆五千自龍馬苑來降夏四月乾歸如枹罕留熾磐鎮之收其部衆

得二萬人徙都度堅山秋七月羣下勸乾歸稱王乾歸以寡弱弗許固請曰夫道應符歷雖廢必興圖錄所棄雖成必敗本初之衆非不多也魏武運籌四州瓦解尋邑之兵非不盛也世祖龍申亡新烏散固天命不可虛邀符籙不可妄冀姚數將終否極斯泰乘機撫運實係聖人今見衆三萬足可疆理秦隴清蕩洮河陛下應運再興四海鵠望豈宜固守謙冲不以社稷爲本願時即大位允副羣心乾歸從之遂以晉義熙五年僭稱秦王

赦其境內改元更始置百官公卿已下悉復本位冬十月復立夫人邊氏爲王后世子熾磐爲太子領冠軍大將軍仍命熾磐爲都督中外諸軍錄尚書事以屋引破光爲河州刺史鎮枹罕以南安焦遺爲太子太師與叅軍國大謀錄其子華爲尚書民部郎

更始二年春正月遣熾磐討論薄地延師次煩于地延率衆出降署爲尚書徙其部衆於苑川三月遣隴西羌昌何攻秦金城郡拔之以驍騎將軍乞伏務和爲東金

城太守秋七月乙丑乾歸討越質屈機等十餘部降其衆二萬五千徙於苑川八月乾歸復都苑川九月攻秦畧陽南安隴西諸郡皆克之徙民萬五千戶於苑川及枹罕冬十月鮮卑僕渾羗句豈輸報鄧若等帥戶二萬來降

更始三年春二月乾歸徙鮮卑僕渾部三千餘戶於度堅城以子勅勅爲秦興太守鎮撫之秦姚興力未能西討恐更爲邊害遣太常索綽爲太尉領隴西內史使來

招諭乾歸感之遣使送所掠守宰謝罪乞降秦復遣使  
署乾歸爲使持節散騎常侍都督隴西嶺北護羗匈奴  
雜胡諸軍事征西大將軍河州牧大單于河南王太子  
熾磐假節鎮西將軍左賢王平昌公乾歸方圖河右權  
宜受之復稱藩于秦夏四月乾歸徙羗句豈等部衆五  
千餘戶於疊蘭城以兄子阿柴爲興國太守鎮撫之五  
月復以子木奕干爲武威太守鎮嶮岷城秋七月遣平  
昌公熾磐及次子中軍將軍審虔率步騎一萬伐禿髮

僞檀八月熾磐率師濟河敗僞檀太子虎臺於嶺南獲

牛馬十萬餘而還冬十月攻秦畧陽太守姚龍於柘陽

堡剋之十一月進攻南平太守王憬於永洛

一作水洛

城又

克之徙民四千餘戶於苑川三千餘戶於譚郊遣中軍

將軍審虔帥衆二萬城譚郊十二月西羗彭利髮據枹

罕自稱大將軍河州牧乾歸率騎三萬討之戰於枹罕

不克

更始四年春正月乾歸復討利髮師次奴葵谷利髮棄

其部衆南奔乾歸遣兄子振威將軍公府追擊至於清  
水斬之乾歸入抱罕收羗戶一萬三千以審虔爲河州  
刺史鎮抱罕而還二月戊巳乾歸徙都譚郊命平昌公  
熾磐鎮苑川因率騎二萬討吐谷渾支統阿若干于赤  
水大破之樹奕干請降乾歸拜爲平狄將軍赤水都護  
又以其弟吐護真爲捕虜將軍層城都尉阿若干爲護  
軍都尉夏五月熾磐率衆攻禿髮儁檀三河太守吳陰  
於白土克之以出累代爲太守六月乾歸敗於五谿有

梟集於其手心甚惡之遂爲兄子公府所弑并殺諸子  
十餘人公府奔固大夏熾磐遣其弟廣武將軍智達陽  
武將軍木奕干率騎三千討之以其弟墨達爲鎮東將  
軍鎮譚郊驍騎將軍婁機鎮苑川熾磐帥文武及民二  
萬餘戶遷於枹罕先是乾歸未亡時枹罕金城見鼠有  
數萬頭將諸小鼠各銜馬屎羣移而渡洮灑二水悉止  
枹罕自是二年而熾磐徙居之秋七月智達等擊破公  
府於大夏公府奔疊蘭城就其弟阿柴智達等攻拔之

斬阿柴父子五人公府奔嶮嶺南山追獲之并其四子  
輟之於譚郊八月塋乾歸於抱罕偽諡武元王廟號高  
祖在位二十四年

十六國春秋卷八十五